

Di li ditti, pur a di 15, ivi. Come, a di 9, zonseno le galie di Baruto de li, e riceveteno lettere di la Signoria nostra venisse esso rezimento li a Famagosta, a far insieme col Capitano e Provedador zeneral la monstra di le fantarie e redurle in numero 700. Et cussi sono partiti da Nischia e venuti li e si va fazando la monstra. Il Capitano di le bastarde è li e si parte e vien via.

221 *Di ditti tutti rectori, date in Famagosta, a di 16 Septembrio.* Come di li su l'isula è gran penuria di formenti per le cavalete, unde hanno scritto a Rodi e Napoli di Romania dove intendeno esser abundantia ne mandino, che li venderano benissimo.

Di sier Bortolamio da Mosto capitano di Famagosta, date a di 15 Septembrio. Una lettera molto longa e copiosa con assà nove, et uno capitolo auto di Alexandria, con avisi, over dil Chajaro, di le cosse di India. *Item*, di la morte di sier Sebastian Zorzi consolo nostro in Alexandria; et come il Signor turco per tutto è odiato sì in la Soria come in lo Egypto; con molti avisi, la copia di la qual lettera noterò qui avanti per esser copiosa.

Di sier Domenego Capello provedador di l'armada, date a Corphù, a di 4 Octubrio. Lauda sier Zuan Contarini di sier Marco Antonio, qual fe' il merchado di biscoti con la Signoria nostra, ha dato miera 350, il qual vien a Venetia. Lauda il biscoto, e sopra tutto aricorda si fazi uno altro mareado.

Dil Baylo e consieri di Corfù, di 18 Octubrio. Scriveno in consonantia in laude di dito sier Zuane Contarini, ha dato li biscoti miara 388; sichè merita gran laude etc.

Fo leto una lettera di sier Francesco Lippomano provedador di Legnago, di 4, et una di 19. Zercha uno caso sequito di certo assassinamento, *ut in litteris*, morto da uno andava in lite a li Auditori novi, da 4 con i quali litigava, ferita soa mojer etc., et li nomina li delinquenti. Unde li Consieri volendo meter la taja et che perdono le raxon di la lite i menava, fo rimessa a uno altro Consejo per intender meglio la cossa.

Fo leto una suplication di uno Gabriel di Zuane da Lona', ha fato uno edificio di segar legnami con poca difficultà, dimanda di gratia altri che lui e soi heredi non lo usi.

Fu posto, per li Consieri, concederli, reussendo ditto artificio, gratia a lui e suoi heriedi che altri che lui non possi usar ditto artificio di segar lignami in el nostro Arsenal, tuttavia reussendo. Fo presa.

Fu posto, per i Savii tutti, una lettera al Signor turco congratulatoria di la sua creation, la copia di la qual sarà qui avanti.

Et di elezer *de presenti* uno solenne orator nostro al dito Signor Suliman imperador di turchi, con ducati 150 al mese per spese, meni con si boche 13 computà il secretario e il so' famejo, possino essere electi di ogni loco et offitio, con pena ducati 500, et fo azonto *etiam* rezimento, et con la dita pena oltra tutte le altre pene, et debbi partir come parerà a a questo Consejo e con la commission li sarà data. Fu presa: ave 194 di sì, 4 di no, e fo notà per Constantin Cavaza.

Fu posto, per li diti una lettera al Baylo nostro a Constantinopoli, come debbi apresenter dita lettera al Signor turco et a risposta de quanto ne scrive zercha le fuste etc. Per il Provedador di l'armada li fo scritto il caso *etiam* per altre lettere scritoli con il Senato, il che credemo inteso quelli signori bassà si saranno giustificati dil sequito e rimangerano satisfati etc. Et fu presa, ave tutto il Consejo.

Poi fo fato i boletini per tuor il scurtinio di lo ambassador al serenissimo Signor turco, tolti 9 de i qual do fo folti per piacer, e fo vergogna dil Stato a nominarli.

Scurtinio di Orator al serenissimo Suliman imperador di turchi.

Sier Trojan Bolani qu. sier ^r Hironimo	25.163
Sier Lorenzo Bragadin, l'avogador di Comun, qu. sier Francesco	69.175
† Sier Marco Minio el consier, qu. sier Bortolamio	117. 69
Sier Zacaria Morexini, qu. sier Marin da san Lucha	17.166
Sier Tomà Mocenigo, savio a Terra ferma, di sier Lunardo, fo dil Serenissimo	41.141
Sier Polo Capello el cavalier, fo savio dil Consejo, qu. sier Vetor	93. 89
Sier Piero Lando, fo savio dil Consejo, qu. sier Zuane	60.124
Sier Alvise Mocenigo el cavalier, el consier, qu. sier Tomà	58.124
Sier Antonio Justinian el dottor, fo ambassador in Franza	89. 95
Sier Vincenzo Capello, fo consier, qu. sier Nicolò	72.109
Sier Andrea Badoer el cavalier, governador di l'intrade	42.143